

DISPUTATIO MEDICA  
DE  
TUSSI,

QVAM  
DIVINA FAVENTE GRATIA,  
Sub  
RECTORATU MAGNIFICENTISSIMO  
SERENISSIMI AC CELSISSIMI PRINCIPIS  
AC DOMINI,

DOMINI  
LUDOVICI,

Ducis Württembergiæ ac Tecciæ, Comitis Montispeli-  
gardiæ, Dynastiæ Heidenhemii, &c.

CONSENSV ET APPROBATIONE  
AMPLISSIMÆ GRATIOSISSIMÆQUE FACULTATIS  
MEDICÆ IN ILLUSTRITUBINGENSIIUM ATHENÆO,

P R Æ S I D E

*VIRO Nobilissimo Excellentissimo atq; Experientissimo*  
DN. GEORG-BALTHASARE METZGERO,  
Med. Doct. Prax. Anat. & Botan. Prof. P. Celeberrimo,  
Præceptore ac Fautore suo omni honoris & observantiæ  
cultu ætatem prosequendo.

P R O L I C E N T I A

SUMMOS IN ARTE MEDICA HONORES, INSIGNIA AC  
PRIVILEGIA DOCTORALIA LEGITIME CONSEQUENDI,

*Ad Diem 21 Julii, horis antemeridianis,*  
IN AULA NOVA.

*Publico examini sistit*

JOH. ULRICUS Raith / Derendingensis.

---

TUBINGÆ,  
Typis excudebat JOACHIMUS HEIN.

ANNO MDCLXXVI.







I. N. 7.

# DISSERTATIONIS INAUGURALIS MEDICÆ PRODROMUS.

**R**Espiramus nunc quidem, DEO benedicente, paulo liberiùs, nec amplius nostrum [hela  
Aspera pulmonem Tussis quatit & per an-  
Igneus efflatur sitientum spiritus ora;  
*uti circa frigidum rigidumq; præteritæ hyemis exortum quamplurimi fuere conquesti: nihilominus cum plerisque ferè morbis Symptoma hoc se associet & de facili sub autumno recrudescere possit, non inanem me lusurum operam credidi, si id locodisputationis Inauguralis, pro ingenij mediocritate, expenderem atque publicæ Φιλιάτρων censura subjicerem. Faxit Sanator Israël, ut hoc meum institutum succedat FELICITER!*

## THESIS I.

**U**Nde suam vox Latina Tussis traxerit originem Etymologi dubitant. Sunt, qui, quod pectus tundat, à tundendo nomenclaturam petunt. Alii fictitiam esse putant, ex imitatione illius soni ac strepitûs, quem edunt tussientes. Nonnulli à Græcorum ῥύσις, quod ex imo thoracis ἀναδύηται emergat, deducere audent. Inter tot sententiarum divortia omnium facilimè se extricant illi, qui immunitatem juris primitivi habere existimant, & proinde frustra derivationes quæri censent. Cæl. Aurelianus diminutivâ



voce T U S S I C U L A M seu modicam tussim *Apulejus* T U S S E D I N E M appellavit. Græcis Βήξ dicitur à Βήξω tussio. *Hippocrati* tamen nostro numerus pluralis Βήξες frequentior est, prout hincinde videri potest. Nostratibus vocatur *der Huste* / Saxon. eleganter *Hoste* / quasi dicerem ὁ ὤσῃς; expulsor, trusor; quæ est etiam species terræmotus Græcis. Reliqua Synonyma quæ vel minus usitata sunt, vel hunc affectum non satis exprimunt, in præsentiarum non addo.

## II.

*Est autem T U S S I S, ut ad Definitionem nunc accedam, vehemens, crebra & sonora spiritûs copiosi prius attracti, è pulmonibus per asperam arteriam efflatio, à facultate expultrice irritata & veloce musculorum thoracis nec non abdominis contractione ad expellendum id, quod spirandi organis molestum, edita.*

*Genus* consistit in efflatione s. exsufflatione. Est-que hæc remotè actio motoria; propiùs expulsoria sed depravata, & quidem mixta, quam facultas naturalis à causa p. n. stimulata orditur, nec tamen sine animalis virtutis auxilio perficere potest. Hinc etiam rectè ad primam symptomatum classem refertur. Vehemens verò dicitur, quia naturali illa & simplici expiratione major est, unde à *Galeno* 2. de *sympt. caus.* cap. 4. σφοδρότατης ἐκφύσεως vocatur. Crebra, quia sæpius ut plurimum idem munus repetit. Sonora denique fit, partim ab impetuosa copiosi spiritûs propulsione, partim à loci, è quo & per quem fertur, singulari dispositione & admiranda structura, de quibus nunc plenius dicendum erit.

## III.

*Præcipuum Subiectum* s. locus affectus sunt pulmones, naturæ folles; non enim nisi his affectis sive primario



mariò sive per consensum tussis fit. Afficiuntur autem non secundum partes quasvis, sed secundum fistulas suas seu bronchia tracheæ, id quod expressis apud *Galenum* verbis 7. *de usu part.* 8. *comm. in 6. aph.* 46. 4. *de loc. aff.* 8. 2. *de cris.* 4. & alibi pluribus patet. Nimirum aspera arteria non multiplici modò ramorum serie per pulmonum dispergitur substantiam, ut aërem necessarium respirationis subsidium, sursum deorsumque jugiter ducat, sed membrana insuper maximè sensili interna gaudet, cujus pulmones tactu admoniti ad molestorum, quæ internam hanc tunicam laceffunt, ejectionem cum impetuosa & sonora aëris per asperas & hiulcas cartilagineum vias efflatione ut plurimum non una, sed pluribus simul & interruptis vicibus, ob ejus, quod offendit, contumaciam, materia vel nimis crassa tenaciusque impacta, vel nimis subtili & expulsionem subterfugiente aut extra vias posita & per consensum irritante, repetita insurgunt. Irritari autem eò facilius possunt pulmones, quod substantiam neutiquam carnosam, ut veterum opinio tulit, sed ex levissimis & tenuissimis membranis, ab ipsis tracheæ bronchiis propagatam habeant, quæ extensæ & sinuatae tantum non infinitas vesiculas orbiculares & sinuosas efformant, alveolis in apum favis similes, unde compressis violentius pulmonibus aër antea imbibitus & collectus ex una vesicula in aliam, hinc iterum in aliam & denique in bronchia per asperas tracheæ vias vel solus vel cum occurrente valdè molestante strepero sono ejicitur, vid. plenius accuratiores *Marcelli Malpighij observationes in epist. gemina Th. Bartholino de pulmon. annexis*. Comprimuntur autem pulmones à contracto undique & angustato thorace, ut cum impetu aërem & obstantia quævis sequacia extundant. Unde *secundarium Subjectum* thoracis



musculos, præcipuè diaphragma, nec non abdominis, partim thoracem detrahentes, partim in abdomine contenta comprimentes, ipsumque adeò diaphragma retrudentes patulumque pulmonum ventrem coarctando, aërem in ipsis fluctantem violentius exprimentes dico, quæ prolixius ex Anatomicorum libris petantur.

## IV.

*Causa immediata* est facultas pulmonum expultrix irritata, (spiritum hanc custodem pulmonis vocat *Petrus Ioh. Faber univers. sap. l. 3. de morb. pulm. cap. 2.*) primò naturalis post animalis; utrumque iterum *Galenus* probat, illud quidem *comm. ult. l. 3. de iis quæ in offic. med. tussim* ajens esse motum p. n. facultatis naturalis & quidem expultricis pulmonis & pectoris, hoc 2. *de sympt. caus.* sternutamentum & tussim symptomata voluntariæ facultatis affirmans, & *l. 4. de loc. aff.* sine vehementi thoracis constrictione tussim effatu dignam non fieri asserens. Scil. motus quidem unus est, utriusque tamen facultatis concursus desiderat; expultricis naturalis irritatæ conatus adest, successus verò nullus sequitur, quem animalis virtutis auxilio aut organis, quibus destituitur, adjuvata perficere nequit.

## V.

Irritantes *cause mediata proxima* sunt quæ molestiæ sensum sive angustiam pariendo sive modo quocunque laceffendo inferunt. *Galenus* intemperiem partium spiritalium & morbum in via accusat *comm. 4. aph. 54. 2. de sympt. caus. 4.* & alibi. Præcipuas autem inter intemperies frigida tenet *l. 1. de sympt. caus. 5. m. m. 13.* quæ pectori inimica *5. aph. 24.* *Cous* tamen etiam calidam nominat, unde tusses subinde aridas in febribus ardentibus fieri scribit *6. epid. s. 2. c. 24.* *Paulus Aegineta* siccae meminit *l. 3.* quibus *Alexander Trallianus* quoque humidam super-



superaddit *l. 5. c. 1.* Ita suo omnes merito inculpantur. An verò intemperies nuda s. sine materia an cum hac plus valeat, aliis disceptandum relinquo, cum si scapham scapham appellare debeam, illa inter non-entia Medica dubio procùl referenda sit; adi *Christ. Langium miscell. cur. med. gymnasm. 2.* De morbo in via adeò res nota est, ut litem huic nemo moveat. Suam autem hîc operam elocant *interna & externa, fluida alia, alia solida, intra vel extra spiritalis vias, primariò aut per consensum irritantia. Fluidorum* locum tuentur humores omnis generis sive secundum sive p. n. corpori inexistencia, & infelix horum progenies, vapores & flatus. Sanguinem hæmoptoë tussim sequens prodit. Alios humores & præcipuè pituitosos communiter dictos nunc acres, falsos vel acidos, nunc blandos & insipidos, nunc tenues fluidosque, nunc crassos & viscosos, nonnunquam etiam purulentos, sordes, quæ excernuntur variæ, sensibus probant, qui sola subinde mole & quantitate, sæpius qualitate aut utraque simul molesti sunt. *Paulus Barbette* in phthisi lympham tam crassiorem vesiculas pulmonum replentem, quàm serosior per pulmones cum succo nutritio circulantem & stimulantem inculcat *l. 3. prax. cap. 2. de phthisi.* Colligitur subinde in cavernulis his ceu *Æoli officina* aër flatuosus ventosique vapores ex crûdo sanguine nati aut extrinsecus concepti, qui nisi per commune hoc corporis ventilabrum debitè expelluntur, cumulati non modò pulmones sed totum sæpè corpus onerant & inflant quod plenius & egregiè pro more suo *Th. Bartholinus de pulmon. f. 2.* deducit.

## VI.

*Solidorum* numerum itidem multa augent, *Theophrastus Paracelsus* tartarum præprimis suspectum facit,



hujusque mucilaginem lutosam parietibus (membrana-  
ceis loculis) pulmonum adhærere, meatus obstruere,  
asperamque arteriam ad expulsionem irritare dicit, qui  
si diuturniori mora crassescit & tandem lapidescit secun-  
dum *Petrum Ioh. Fabrum l. c.* grandines fiunt & calculi;  
ab illis diuturnam *Galenus* tussim memorat 4. *de loc. aff.*  
8. Eandem à calculis hîc concretis *Fabr. Hildanus l. 2.*  
*obs. chir.* 29. & complures notarunt. Vermibus hæ pul-  
monum cavernæ interdum etiam hospitium præbent,  
quos tussi excretos *A. Benivenius de abditis rerum caus. c.*  
77. vidit, folliculis singularibus in Tursionis pulmoni-  
bus inclusos *Th. Barthol. cent. 2. hist. Anat.* 25. *de pulm.*  
f. 2. observavit, unde persuasi Veterum nonnulli tusses  
ferinas ab *Hippocrate 6. epid.* adductas non alias credidêre,  
quàm ubi lumbrici ejiciuntur, *H. Mercuriali teste l. 2.*  
*med. pract. c. 1.*

## V I I.

Inter *Externa* choream ducit ær frigidus 3. *aph.* 23.  
mordax 5. *aph.* 20. fumosus, pulverulentus, salinis,  
mineralibus halitibus refertus qui ore haustus pulmoni-  
busque exceptus, irritare non modò spiritales vias no-  
vit, sed pertranseunti sanguini quasi manum injicit,  
cursum sistit, figit, & subita non rarò nec opinantès  
mortè opprimit, autore *Malachia Truſton diatr. de respir.*  
*usu prim. f. 19.* Succedunt esculenta & potulenta quæ ni-  
mis salita, adstringentia, aromatisata, acria, coepæ cru-  
dæ, piper, item rancida & oleaginosa (quo nomine ma-  
lè audiunt, nuces juglandes & amygdalæ vetustæ) nico-  
tianæ Circeæ secundum *Lindenium c. 6. phys. med. n. 183.*  
herbæ fumus jugiter in pulmones tractus, venena quæ-  
dam ut arsenicum, Βηχικὰ fiunt; ita ex acri limonum  
succo excessivè sumto tussim natam *Nic. Tulpius descri-*  
*pſit l. 4. obs. med. c. 20.* parem è potu vini mustei *Loti-*  
*chius*



*chius l. 3. c. 1. obs. 2.* notavit, idemque de cerevisia non rectè fermentata aut defecata iudicium. Frigida hausta corpore toto ex itinere æstuante acerrimam tussim irritavit apud *VVolfg. Gabelchoverum cap. 4. cur. 28.* magisque nive vel glacie alterata teste experientia & *Hippocr. in aph.* deglutita enim per oesophagum asperam arteriam propè adjacentem plus æquo refrigerat secundum *Highmorum anaceph. p. 258.* vel concentrato per antiperistasin calore pulmones & viscera reliqua impensè calefacit & velut igne admoto tantum non comburit secundum *Th. Barthol. de nivis usu med. cap. 35.* vel nitroso sale mordet *cap. 7.* Unde *Plinius l. 19. cap. 4.* non injustè invehitur in patritios & divites his verbis: Hi nives, illi glaciem potant, poenasq; montium in voluptatem gulæ vertunt. Servatur aliorum æstibus excogitaturque ut alienis mensibus nix algeat. Saliva in laryngem acrior aut impetuosior irruens, alia quæcunque in ventriculum ingerenda à via aberrantia & laryngem tentantia, (quod specialiter das *Verfürmen* vocant, iisque ferè accidit, qui loqui simul & deglutire, simul flare & sorbere volunt, eadem culpâ tenentur,) cui vacat plura ex *Gal. l. 2. de simpl. med. fac. c. 17.* petat. Hirudo in faucibus hærens, lapillus in tonsillarum abscessu concretus apud *I. Langium l. 2. epist. med. 57.* nucleus avellanæ deglutitus *Th. Barth. c. 2. histor. anat. 27.* cerasi, *Sennert. l. 2. prax. p. 3. c. 3. & 5.* sternutamenta per nares ad fauces præcipitata, aqua, pus, in cavitate collecta, turundæ ex oscitantia chirurgi per vulnus in cavum raptæ ex *Hild. cent. 1. obs. chir. 46. c. 3. obs. 36.* parem effectum dederunt. Apud eundem globulus vitreus in auris meatum immissus *cent. 1. obs. chir. 4.* auris nimis altè & profundè titillata apud *Highmorum l. 2. anat. p. 3. c. 1.* ob ramulum è quinto pari nervorum auditorio ad laryngis musculum sparsum; quam tamen

nervo-



nervorum propaginem *Rolfincius* perpetuam non credit *disf. anat. l. 4. cap. 36.* tussim movit, ex annatis pulmonibus idem *Th. Barthol. l.c. de pulmon.* factum animadvertit.

## VIII.

Cæterum causam hanc omnem in pulmonibus obviā vitiō pulmonum propriō à Vulcani corruptoris, qui ex bono alimento phlegmata fabricat, infirmitate generari, ut *Ioh. Bapt. Helmontius* vult, credibile non est, sed sæpius aliunde advenit & hîc colligitur. Vulgata Veterum opinio est, depluere, pituitosum præcipuè, de capite vel cerebro; melius moderni, sub oculationi hodierna anatome, edocti, nec tales tantasque cerebro fordes concedunt, nec vias, si adessent, unde tam promptè in pulmones descendant, vident; ea enim sæpè sentina exantlatur, cui nec cerebrum nec patulus pulmonum venter capiendæ sufficiunt. Vero similis igitur frequentiores tussis causas suppeditant vitiosi humores varij à toto corpore cum sanguine reduce ad cor transmissi & velut in cloacam per arteriam pulmonalem in pulmones exonerati. vid. *Nobiliss. Dn. Præsidis Præceptoris mei fideliss. aviternum summè colendi disp. 3. de sangu. in circ. motu thes. 8.* Ita hepar & alia viscera in putrilaginem soluta tussi rejecta testatur *Schneid. disp. de phthis. ver. nat. & rect. cur. rat. repetitque l. 4. de catarrh. c. 3.* Non alienum à veritate, sed hypothesi non concessa, videtur *Ioh. Mayovv. tr. de respir. p. 4. seq.* humorem pituitosum qui tussi rejicitur, ex nervorum ramificationibus asperæ arteriæ & bronchiis communicatis emanare. *Schneid. hinc inde de catarrh.* per laryngis vasa & tunicam sudare putat. *Iacobus Heinr. Pauli* per lymphatica jugularia vasa magnam partem descendere credit *in anat. Bilf. anat. c. 8.* Suumque etiam contribuere lymphatica in pulmonum parenchyma immersa secundum *Olaum Rudbeck de vas. gland.*



gland. seros. tab. 2. fig. 1. possunt. Sub mutato enim & perturbato humorum motu variæ viæ naturæ necessitati cedere possunt. vid. *Conring. de motu sangu. & gener. c. 38. Nath. Highmor. l. c. c. 6. Guern. Rolfinccius l. 6. Anat. c. 27.* Pro pure à pleura deferendo manifestas pororum vias cum *Th. Bartholino diatr. de pulm.* multi eligunt; commodius à pulmonibus petitur, unde facilè in vesiculas, hinc in hiantia bronchia influit, vid. *disp. inaugur. Dn. D. Hannekenij de pleuritide th. 18.* A' thoracis cavo promptè, quicquid insidet, per foramina tunicæ pulmonum patentia imbibitur, quæ sursum materiam quamcunque de facili admittunt, variis id attestantibus exemplis à *Th. Bartholino l. c. f. 7.* citatis, viditque *VValæus* pisum majusculum hos in poros inseri potuisse, in notis *Leonhardi Blasij ad Veslingij anat.* Malè tamen ita & aërem descendere è pulmonibus in cavitatem subsumit *Helmont. l. de catarrh. delir. §. 45.* contra quem feliciter calamum strinxit *Th. Barthol. de pulm. f. 7.* ferè per totam. Intrare vermificum sive animatum seminium cum aëre hoc imprægnato potest secundum *Athanas. Kircherum de peste*, potest cum sanguine verminante influere, *ephem. nat. cur. anni 1. obs. 50.* potest inibi ex corruptis pulmonibus nasci in phthisicis, vid. *Th. Barth. cent. 1. hist. anat. 46.* Utrum & quo vermes modo in ventriculo & intestinis hospitantes tussim movere queant *P. Salius Diversus in annot. super lib. Donati ab alto mari c. 47.* quærit; R. per vaporum putridorum ad pulmones appulsum, qui vel per gulam elevati unà cum aëre in pulmones alliciuntur, vel per lacteas venas in cor & pulmonum vasa & substantiam membranofam usque in tracheam inseruntur & continuò sine sui expulsionè irritant; quam viam etiam hypochondriacorum flatibus moderni monstrant vid. *Franc. de le Boë Sylvius in l. 1. prax. p. 3. c. 5.* Ventoso aliàs aëri cum sanguine in pulmones



irruenti arteria pulmonalis, extrinsecus trachea viam facit.

## IX.

*Remotiores* disponentes ex naturalium, non-naturalium & præternaturalium serie fluunt. Inter *res naturales* primum occupat locum temperamentum frigidum & humidum, phlegmaticum, calidum & humidum, quod defluxionibus obnoxium *Galenus* facit 6. de sanit. tuend. c. 3. s. m. m. 7. densus durusq; corporis habitus minus perspirabilis. Huic succedit ætas; infantilis s. 3. aph. 27. ad tussim proclivis, ob alimentorum copiam & inde humiditatum abundantiam, insensilis halitus effluxu plerumque non satis expedito, conferre etiam symbolum suum noviter haustus aër sub primis in recensnatis diebus potest. Senilis, ob crudorum humorum luxuriam tussiculosa s. 3. aph. 31. Unde satis aptè *Terentius* nomen *Chremetis* personæ senili imposuit ἀπὸ τῆς χρέμπεδος quod excreare notat. Juvat nonnihil etiam vitæ genus, hinc cantores, tubicines, qui respirationis organa continuò exercent, ab emissio jugi spiritu, tracheæ siccitatem experiuntur, chimici, aurifabri, metallifossore, murarij, lapidicæ & cœmentarij, quorum pectora mineralibus, calcis recentis vaporibus ac pulveribus replentur, sæpiùs non modò tussi afficiuntur, sed phthisi ut plurimùm obnoxii sunt secundùm *VVolf. Hæfer. Herc. med. t. 1. l. 2. c. 2.*

## X.

In *rerum non-naturalium* classe aëris ambientis constitutio plurimùm valet. Hyemalis cùm destillationum ferax sit, creberrimè prolem βήχην producit juxta 3. saph. 23. Hinc *Catullus* frigore rigens in malam tussim incidit, ut meminit *carm. in Fundum v. 13.*

*Hic me gravedo frigida & frequens tussis  
quassavit, usq; dum in tuum sinum fugi,  
& me recuravi ocimog; & urtica.*



Ex aquilonari idem malum senex noster minatur 3. *f. aph.* 5. iis præcipuè qui corpus habent *νοτερόν*. Vernalem quod humores fundat, fluidosq; reddat pariter *f. 3. aph. 20.* accusat. Anomala quæcunque & inæqualis ex decreto 13. *aph. sect. allegatæ* idem patrat. Influxus astralis epidemias nonnunquam gignit tusses. Luna si fuerit sub terra cum aliquo planeta malefico in aliqua domo Tni utpote in capricorno vel aquario, pectoris dolorem cum tussi excitabit ex *Abra. Avenaris* sententia. Viribus aliquomodo respondet aëri ambienti frigiditas & caliditas, quæ pauciori vel abundantiori vel calidiori vestitu externis pectori impositis quibuscunque aliis conciliatur, vid. *Leonh. Botallum de catarrh. c. 3.* Esculenta & potulenta pariter si quantitate exorbitent catarrhis & consequenter tussi non levem ansam dant secundum illud Germanorum vulgatum: Viel Güsse machen viel Flüsse/ in die Lung und Füsse; sæpenu-mero verò qualitatibus nocent quas sanguini affricant, de quibus jam ante. Ex nimia corporis commotione ancilla præfecti cujusdam capiti in lecto petulanter innitens, pedibus sursum versis, hat im Bett ein Baum gestellet/ tussim acerrimam incidit cum plurima exscreatione, à qua per 7. septimanas multis etiam usurpatis remediis liberari non potuit apud *Gabelchoverum cent. 3. cur. 3.* Somnus & vigiliæ si modum excedant suum quoque addere symbolum in propatulo est. Decubitus similiter in somno supinus nonnullis tussim movet. Animi affectus, excandescencia præprimis vel risus effusus. Evacuationes consuetæ, hæmorrhoidum, mensium, intermissæ, diaphoresis impedita, salivalis humor retentus viam pariter sternunt.

## XI.

Ex *praternaturalibus* potissimum frigida capitis & cerebri intemperies accusatur, rectius sanguinis; plethora, cacochymia, fomitem suggerentes, delirium, abscessus



ad aures ex *Zac. Lus. prax. hist. l. ult. c. 2. n. 5.* tussim concitant; thoracis angustia, pulmonum, diaphragmatis, quæcunque ferè & vicinarum partium p. n. dispositio, ventriculi debilitas, inflatio, cruditates coacervatæ, unde puerorum ut plurimum tussim derivat *Ettmüllerus in valetud. infant. §. 23.* vermes in ventriculo & intestinis hospitan-tes, hepatis, lienis intumescencia, hydrops, malum hypochondriacum, scorbuticum, hernia, renum imbecillitas serum non debitè abducens in pueris sæpè causa tussis fit secundum *Mercatum de morb. pueror. cap. 8.* Exemplum *Riverius* citat *cent. 1. obs. 55.* testes inflammati 2. *epid.* non longè à principio, ob consensum spiritalium, ut putant, cum genitalibus singularem, febres magnæ, hecticæ præcipuè nec non malignæ apud *Hipp. in Coacis*; variolæ, morbilli, scabies retrocedentes, vertebrarum luxatio, gibbositas, evacuationes consuetæ suppressæ de quibus th. præced. actum.

## XII.

Sequuntur *Differentiæ* quarum prima desumitur à *Genere*. Efflatio illa magis vel minus vehemens est. Valida ac violenta, *ἰνερωδὴς*, ferina, de qua *Anutius Foësius in æcon. Hipp.* legatur, hæcque vel sonitum acutum habet, unde *Quinta & Quintana* vocatur, qua de consule *Ballon. in epid. & ephemer. l. 2. p. 256.* Vel raucum clangorem edit & *Ovina* in vernacula etiam nostra *Schaffhuste* dicitur. Exigua verò docente *Galenol. 2. de caus. sympt. c. 4.* impetus quidam & quasi tussiendi initium est, Græci *κέρχρον* nominant. Deinde tussis alia *ratione* *materiæ* arida est & sicca *βὴξ ξηρὰ ἀπλυσος §. 4. aph. 54.* in qua nihil excernitur sed irritato defatigatur corpus totum tussiendi conatu, seu facultatis seu *materiæ* vitio aut defectu. Alia *ὕγρὴ πολύπλυσος*, humida, in qua humor aliquis tenuis ac paucus rejicitur, nunc copiosus crassus ac pinguis (ut phrasi utar *Plautiana*) satis magnificè excreatur. Ratione *Subiecti* alia omnes pulmo.



pulmonum fistulas, alia nonnullas, dextrum vel sinistrum lobum affligit, alia in ipsis pulmonibus generatur, alia aliunde suppeditatur; illam καὶ ἐξοχὴν vocamus *ein Lungenhusten*. *Figura intuitu* rursus quædam cum sputis est inæqualibus, laceris, angulosis; alia æqualibus, globosis, ad vesicularum suprà thes. 3. depictarum formam effigiatis. *Temporis ratione* alia recens, alia inveterata: talem triginta quatuor annorum descripsit *Baldass. Timæus l. 2. cas. med. 14.* Alia est periodica, quæ per certa intervalla; alia continua quæ sine intermissione ægrum fatigat. *Ratione complicationis* alia simplex & solitaria quæ cum nullo alio morbo conjungitur, alia composita quibusdam adjuncta deterioribus affectibus, ut variis dyspnoæ speciebus aut phthificæ passioni, sanguinis rejectioni, hydropi asciti, lumbricis, febribus, raucedini, lipothymia &c. *Moris & invasionis respectu* quædam maligna, contagiosa, epidemica, qualem hîc locorum sub elapsæ hyemis initio experti sumus, pluribusque de hac videatur celeberr. *Dn. D. Sennertus lib. 4. de febr. c. 17.* quædam benigna sporadica.

## XIII.

Quæ *Signa Diagnostica* omnis quidem tussis visu & auditu faciliè cognoscitur, nec signis opus est aliis: ut tamen causæ cognoscantur variæ, omninò his opus est. Feri nam malignitas & vehementia prodit; & in specie *Quintana*, qua infantes & impuberes infestantur, hisce indiciis deprehenditur, quod cum acutissimo sonitu & singultu quodam prodeat, nullis admissis induciis aut respirandi spacio, adeò, ut intercepto occlusoque anhelitu suffocatio immineat, vid. *Lev. Lemnium de occult. nat. mir. l. 3. p. 287.* Ovina faciliè ex rauco illo & horrissono strepitu cognoscitur. Si per essentiam fit, nulla aliarum partium affectarum signa adsunt; si per consensum aliorum membrorum, id læsiones & dolores eorundem indicabunt, tum



signa ex propriis locis petenda. Quæ ex dyscrasia calida producta est, è sensu caloris totius vel partis cognoscitur, item è siti, non qualibet, sed quæ frigida inspiratione sedatur, ut docet *Galenus art. med. cap. 64.* rubedine faciei, pulsu magno, causis prægressis calefacientibus, juvantibus denique & nocentibus. In frigida verò signa contraria apparent & tum calida prodesse sentiuntur, cohibitione spiritûs non solum reprimitur, sed etiam sanatur teste *Pergam. l. 2. de caus. sympt. c. 4.* Tusses à ficcitate vel humiditate ortæ simili ratione dignoscuntur, in illa asperitas & siccitas faucium urget, in hac contra fit, humida semper excernuntur. Compositæ è signis complicatis patefcunt. An verò humor admixtus, & qualis ille sit, indicabit sputum determinatum. Si sanguis, rubrum est quod excreatur; si bilis, flavum vel viride erit; si pituita album; si cineritium simulque fundum petens, communi voto pus judicatur, ita calculi, vermes &c. suis se propriis produnt indiciis. Postremò num sola qualitate vel quantitate talis peccet ex sapore qui vel dulcis est aut insipidus, salsus, amarus, acris, acidus, & copia sputi quæ modò major vel minor colligi poterit.

## XIV.

*Prognostica signa* triplicis generis sunt. Alia salutem vel mortem, alia longitudinem vel brevitatem morbi, alia modum solutionis prænunciant. Quæ salutis spem vel mortis periculum injiciunt desumuntur i. à *Genere*. Tussis vehemens in primis Quintana in infantibus respirationem & somnum impedit, sæpè etiam ex multa quassatione caput commovet, febres acutas, epilepsiam & hernias excitat, urinam, alvi feces involuntariè extrudit, interdum planè suffocat. In adultis vasorum pulmonis rupturam, sputum sanguinis, saniei, & phthisin, in prægnantibus verò abortum minatur. Tussis minimè laboriosa quam in-

sequi-



sequitur facilis sputi educatio & levamen, valida existente virtute, semper salutaris, juxta illud tritum: bonus sputator, bonus evasor. 2. *ASubjecto*. Ab ulcere pulmonum & apostematibus duris viam spirandi coarctantibus semper mala. 3. *ACausis*. Tussis ex intemperie ut loquuntur simplici non prorsus despicienda, sicut *Galenus* docet exemplo adolescentis, qui ex tussi à causa frigida dimidiam heminam sanguinis rejecit. 5. *meth. med. c. 13*. Periculosa etiam illa est, quæ fit à materia catarrhali tenui & acri, vid. 6. *epid. comm. 3. t. 18*. Hydropi superveniens mala & desperata, juxta 6. *aph. 35*. nec non 7. *aph. 49*. exemplum hydropici *Ctesiphontis* hoc testatur; in quo ἐπὶ τῇ τελευτῇ βῆξ καὶ πνίγμοι ἐγένοντο ἐς νύκτα & tandem ægrum sustulerunt 7. *epid*. Grandinosæ denique ac calculosæ admodum anticipantes. Tussis ex propria sua natura affectus longus est, pro causarum tamen aliorumque accidentium ratione variat. Valdè senes inducias cum tussi, nunquam tamen firmam pacem inire possunt, unde non malè horum conviva dicitur, quia eos plerumque comitatur usque ad mortem. 2. *aph. 40*. hocque non modò de aliis ægris senibus, sed & de Medicis verum est, contra jocosam *Leonici Medici* limitationem à *Brassavolo in comm.* citatam. Modus solutionis καὶ ἐκκρεσις optimus est, quando materia peccans iusta qualitate & moderata quantitate per loca conferentia cum ægri ἐν φρεσὶ evacuatur. Tusses siccas solvit alvus amplius subducta in his, qui tonsillas destillatione vexatas habent. *Hippocr. de dentit.* Tussiculæ quæ sunt cum sputatione, abscessus circa aures submovent 1. *proorrh.* Quibus verò tussis nihil elidit & sicca est; ea non nisi valido coxendicum dolore aut crurum aut testium solvitur 2. *epid. s. 5. t. 16*. sed de hujusmodi signis pro nunc satis.

## XV.

Succedit ipsa *Curatio* quæ duplex est: *Ordinaria* scil.  
& *Coar-*



& *Coacta*. Ordinariam à remotione causarum, quarum quælibet peculiarem indicationem suppeditat, auspicamur. Intemperies igitur per contrariam qualitatem alteranda, viarum morbus tollendus, materia crassa attenuanda, tenuis incrassanda, viscida incidenda, abstergenda: acris demulcenda, motu peccans revellenda, intercipienda, derivanda, evacuanda, in pulmonibus & bronchiis generata aut collecta loco movenda. Ubi per consensum cum aliis primariò affectis, ventriculo, liene, hepate &c. malum oritur, & his debito modo succurrendum. Coacta ipsam tussim, ut naturam urgentis symptomatis habet, respicit, quæ per lenientia, sensus acrimoniam obtundentia & similia peragitur. Auxiliorum materia è tribus consuetis fontibus, diætetico, chirurgico, pharmaceutico haurienda.

## X V I.

*Fons Diæteticus* legitimum sex rerum non naturalium usum commendat. Aër intemperiei & causis morbificis contrarius sit, In calida ergo causa quærat frigidus, cibi refrigerantes & humectantes offerantur, quales sunt ptisana, hord. malva, borago, bellarium ex lacte, amylo, butyro & saccharo paratum, ad pultis formam & consistentiam coctum & similia. Potus sit aq. hord. decoct. citri, emuls. amygd. dulc. sem. 4. fr. &c. In frigida aër calidus eligatur, si talem ferunt anni tempora, sin minus, arte talis paretur. Crassus, turbulentus, nebulosus, flatus pariter ventorum impetuosius caveantur. Victus sit ex cibis calidis, pectoralibus, aromatizatis, jusculis ex cerevisia, melle, butyro & pauxillo croci paratis, ovis sorbilibus, vel edulio ex ovis, vino, saccharo & butyro confecto, quod Nostrates *Weinwarm* vocant. Panis sit benè fermentatus & sem. foenic. vel anisi conditus; carnes facilis digestionis bonique nutrimenti. Potus sit vinum gene-



generosum, dulce, enulatum, salviatum, vel mulsum. Convenit etiam aliquando jejunare & cibo parcius uti. In amictu pectus pedesque diligenter contra aëris injurias muniantur. Exercitatio corporis sit moderata. Somnus & vigiliæ mediocritatis leges non excedant; excrementorum in corpore proventus per consuetas evacuationes præcaveatur; metus, tristitia cæteraque mala animi accidentia in exilium mittantur.

## XVII.

*Chirurgicus* sistit omnium communissimum instrumentum v. sectionem; hanc verò ut nec in omni tussi, nec huic ut tali commendo, ita nec simpliciter, nec semper, causarum & aliarum circumstantiarum intuitu rejiciendam censeo. Scil. ubi plethora, notabilis sanguinis impetus aut ventositas, ubi solitæ hujus evacuationis suppressio, sputum sanguineum, aliaque sanguinis evacuationem suadentia adsunt, cæteris paribus, & consentientibus omninò suadeo, hacque ferè unica molestissimam tussim promus condus observationum *Ioh. Schenckius l. 2. obs. 2. de tussi* curavit. Secus ubi aliter se res habet, ita enim in epidemica superioris seculi 1580. nec non sub illa æstate anni 1559. orta ex *Th. Bartholini* observatione in *ephem. colleg. nat. curios. anni 1. obs. 61.* plerosque jugulavit. Ubi igitur locum habeat, morbi & causæ morbificæ conditio, ægri virium constitutio & similia determinabunt. Quod idem de V. s. vicariis cucurbitulis scarificatis dicendum. Multum auxilii etiam promittunt fonticuli in tussi præsertim diuturna catarrhali, ubi scaturigo à sanguine venit, quos ideò laudant *Mercurialis cons. 14. Iul. Casar Claudinus consult. med. 10.* Fiant autem rectius in artubus quàm capite. Rationes videantur in *disput. Nobiliss. Dn. Præsidis de fonticulis.* Nonnulli etiam setaceum approbant in scroto affixum ob magnum pectoris & pudendorum consensum



ab ipso *Hippocrate* confirmatum qui tussim siccam per abscessum testium supervenientem levatam ostendit 2. *epid.* vid. *Rod. à Fonseca consult. med. t. 1. obs. 60.* Verum an eodem modo abscessus natura & arte facti juvent, dubitare licet. Sit verò tutum remedium; at infuetum, quod æger ægrè admittet. Nec vesicantibus parcendum; sanguini enim depurando multum opis præstant. Frictiones fuliginibus expeditam viam faciunt, ligaturæ impetum furiosæ materiæ coërcent & ab hac partem affectam quadante nus liberant. Pectinationis etiam non planè nulla vis est, si fidem meretur, quod scribit *Helmontius l. de sextupl. digest. aliment. t. 28.* asinam lactis gustu dignosci, num pexa fuerit isto mane an non.

## XVIII.

Cætera *fons Pharmaceuticus* expedit universalibus & particularibus ita dictis evacuantibus & alterantibus, internis, externis, simplicibus & compositis, ex triplici animalium, vegetabilium, mineralium, regno petitis. Universalia illa communiter audiunt, quæ totius massæ sanguinæ cacochymiam, tussis fomitem, expurgant, quæ pro peccantis materiæ varietate & corporis laborantis conditione varia sunt hinc inde obvia. Primas autem tenent alvum ducentia & inter hæc blandiora, manna, mechocanna, rhabarb. sem. carthami, agaricus crud. & trochisc. fol. senæ, sir. ros. sol. rhab. c. cichor. de manna, cass. fistul. recenter extr. & hujus farinæ similia; his non sufficientibus fortiora sequantur, gialappa, scammonium, colocynth. helleb. &c. & hinc educta varia. *Riverius* calomelanos suum laudat c. ref. gialapp. aut diagryd. c. 3. *obs. 31. 47.* Præmitti non rarò his, ubi affectus inducias indulget, præparantia solent, in vulgus nota & interna alterantia mox recensenda. Clysteres suo pariter fructu non destituuntur, vel saltem domestici, præsertim in tussi hypochondriaca,



driaca, ubi alvus lubrica sit, oportet. Vomitu ab aqua benedicta procurato tussim tùm recentem tùm inveteratam plerumque, si non semper, curari *Ioh. Hartman. in prax. chymiatr.* scribit. Sed magnâ hoc loco in generosi hujus auxilij usu circumspectiōe opus esse censeo, quod primam quidem regionem ventris ab impuritatibus liberare, fortè etiam ex pectore fluctuantem ibi sentinam extundere novit quadantenus, sicque catarrhos & hinc oriundas tusses sistere potest; at in inassuetis, indispositis, sæpè vasorum rupturam, hæmoptoën & phthisin post se relinquere solet. Diuretica inter universalia etiam fortiter hîc se non modò gerunt, dum sanguinis serosam colluviam per vias urinarias optimè abducunt; experimentum *Riverius* vidit renum præsertim peccante imbecillitate, in puero tussiente, cui frustra omnibus adhibitis regionem renum inunxit ol. scorpion. *Matthioli* ter de die, unde tussis cessavit. *cent. 1. obs. 55.* sed & natura ipsa duce, è thorace ipso sæpè hûc materia felicissimè amandatur, ut empyicorum, pleuriticorum pus abunde testatur. Diaphoretica itidem vitiosam sanguinis sentinam tussis fuscitabulum per omnem corporis habitû per minutos sc. glandularum cutanearum ductus egregiè eliminât, præcipuumque usum habent ubi malum epidemicum, miasma malignum suspectum est. Aliquando etiam ad salivationem recurrendum esse non malè putat *Sylvius l. c. §. 33.* de qua & variis hanc excitandi modis videatur *Rolfinccius m. m. spec. comm. l. 6. §. 3.* per totam.

## XIX.

Particulares evacuationes per errhina non rarò suam hîc etiam pollicentur operam, quatenus humores serosos in pulmones aliàs fluxuros ad nares derivant: materiam præbent succus anagall. betæ, majoranæ. Expectoran-  
tia, Βηχινα Græcis dicta in curatione tussis utramque ferè



paginam absolvunt & quidem variis in formis, quas non avaritia Medicorum, quam *Plinius* allegat l. 22. c. 24. sed ægrorum lubido, causarum morbificarum varietas & usus commoditas invenit; convenientissimè autem solidiori formâ usurpantur, ut sic in ore diutius retineri, sensimque per rimulam asperæ arteriæ humori salivali permixta descendere, & contenta in pulmonibus excrementa ad facilem educationem præparare queant. In causa calida ac tenui imprimis talia proficua censentur quæ refrigerant simulque vi sua emplastica incrassant, qualia sunt ex simplicibus: Radices alth. bugloss. endiviæ, glyzyrrhizæ, polypodij. Folia alth. capill. Qis, malvæ, tussilaginis. Flores, malvæ, nymph. pulm. mac. violar. purp. Semina: hordei, malvæ, alth. cydon. papav. 4. frig. maj. & min. Fructus: passul. min. amygd. d. pineæ rec. pistacæ, jujubæ, sebesten, poma Borsdorfiana. Ligna: santalorum species. Gummi: arabicum, tragacanthum: Lapidēs pretiosi: margaritæ, mater perlar. fragmenta 5. lap. pretios. Ex animalibus desumpta: ova tremula, butyrum, cancri fluviatiles, ranarum fluviatil. coxæ, pulmo vulpis, vituli, lac human. caprin. &c. Ex his & similibus variis sub titulis varia in officinis prostant composita, utpote sunt eclegmata quædam lenta: de mucilaginibus, passul. psyll. portulaca. Aquæ destillatæ: pulmon. vituli, bugloss. capill. Qis, farfaræ, nymph. papav. err. Trochisci ac orbiculi, lupinares à similitudine dicti, sæpius de die noctuque præsertim cubitum ituris exhibiti, ut sunt bechici albi & nigri, diatrag. frig. diamarg. frig. diapendii s. spec. Tabulæ item usitatæ, ut sacch. rosat. tabul. violat. Species ac pulveres: diatrag. frig. diamarg. frig. bol. armen. & similes. Sirupi: viol. jujubin. de nymph. papav. s. rhead. de Zizyphis. &c. Si validiora inhibentia humorum orgasmus imperat, diacodion Montani, theriaca recens, trochisci de carabe, philonium Romanum in usum vocandæ; laudanum opiatum dextrè præp. ac adhibitum hoc in casu laudatum medicamentum est, ex *Helmontii* etiam commendatione, censoris aliàs rigidi, *libr. ius duumvir. inscripto §. 62.* In crassis verò, viscidis,



viscidis, calore resiccatis concretisve humoribus ex consilio *Hippocratis nostri l. i. de morb.* partes respirationi servientes largo potu humectari debent, quo in casu emulsiones ex semin. 4 fr. maj. amygd. dulc. pineis, cum aq. destillata pector. fr. paratæ, nec non decocta varia e. g. prunor. hord. flor. & fructuum, pect. Aug. secundarium raporum cum sirupo aliquo pector. frig. vel saccharo cand. edulcorata valdè utilia creduntur. In causa frigida & crassa talia conveniunt quæ calefaciunt, attenuant, incidunt ac abstergunt. Inter simplicia sunt: Radices ari, angelicæ, fœnic. ireos, helenii, squillæ, saponariæ, scabiosæ, tussilaginis raphani: Folia: herb. 5. capill. marrubii, scabiosæ, veron. nicotianæ, hed. terr. hyssopi. Flores item modò dictarum plantarum. Fructus: caricæ pingues, uvæ passæ, amygd. amaræ. Semina: anisi, fœnic. fœnigræc. lini, chærefolii. Aromata: crocus, ob vires suas in pectoris affectibus egregias pulmonum animadictus. Ligna: sassafras, guajac. Gummi: ammoniacum, terebinthina, benzoë, myrrha thus. Marina: ambra, succinum. Animalia alb. græc. sperma ceti, mel, moschus, Zibethum. Ex officinalibus compositis non parum laudis merentur tabulæ illæ diaireos simpl. & Salomonis, diatragacanthi cal. & similes. Sirupi item varii, quos inter sir. de glyzyrrhiza, de farfara, hyssopo, oxymelite squill. s. & comp. ferè famosiores sunt. Species & pulveres: diaireos s. Salomonis, diatrag. cal. diapen. diaprass. diahyssop. diathamar. flores benzoini, fl. sulphuris aliquoties ~~mati~~, lac sulph. cui secundum *Quercetani* testimonium nulla hîc medicina parest. Conservæ: veronicæ, helenii, scabiosæ. Extracta: angelicæ, helenii. Olea stillat: anisi, fœniculi. Balsamus sulphuris. Aquæ destillatæ: veronicæ, hederæ terr. scabios. salviæ, pector. *Sennerti*, pector. cal. *Dorncreilii* & aliæ quam plurimæ. Multum hîc etiam conducunt eclegmata s. looch uti sunt sanum & expertum, de caulibus, prassio, pino, tussilagine, de pulmone cervi, vituli, vulpis, in pulmonibus roborandis magnarum pariter virium, quæ tamen affectatus ille scholarum ac officinarum Medicarum reformator *Helmontius* cum potissimis jam adductis & contra tussim aliàs usitatis decoctis, tabulis ac sirupis irridet contraque sanam rationem & experientiam hæc omnia & singula proscribit *lib. asthma & tussis inscripto* §. 76. & seq. Cæterum cum vel acidi sunt humores desiderant ad sui corre-



ctionem ocul. cancr. CC. uſtum, ebur, corallia. Salſi, gummi arabicum, tragacathum, ſucc. althææ, glyzyrrh. pil. de cynogloſſa. In tuſſi puerorū prodeſt ol. amygd. dulc. rec. expreſs. nec non ſperma ceti cum liquore appropriato ſolutū. In epidemica talia conueniunt quæ ſimul alexipharmaca vi gaudent, v.g. ſcabioſa, heleenium. Tuſſis ſcorbutica præter hæc pectoralia, quibus plerumq; exaſperatur, antiſcorbuticis aſſociatis extirpatur. Inſignis quoq; efficacix in tuſſi poſſimum inveterata phtihſica iudicantur vapores, halitus ac ſuffitus, ex convenientibus bechicis tuſſilagine, ſcabioſa, nicotiana, ladano, thure, ſulphure aliisque pro diuerſo medentis ſcopo parati, orisq; ſuctu attracti per peculiaria hunc in finem conſecta inſtrumenta à *Chriſt. Benedicto in theatro tabid. exercit. dianoët. 28. deſcripta & p. 184. depicta*, hinc enim ut tardum ab aliis bechicis ferè auxilium ſperatur, citius & facilius promittitur, vaporibus his cum aëre continuò & confertim attractis *Th. Barthol. c. 4. obſ. 88.* ſed ut taceam ſub crebriori horum uſu viarum ſpiritualium vel nimiam exiccationem nec non ſpiritus inhibitionem eſſe metuendam, tuſſis ipſa ita irritari magis videtur. Reliquis cauſis ſua quoque debentur remedia.

## X X.

Alterantia externa vel univerſalia ſunt vel particularia. Univerſalia totum corpus reſpiciunt: in frigida & humida cauſa thermæ ſulphuræ laudantur; in calida & ſicca teſtimonio *Galeni l. 7. de loc. aff. c. 3.* balneum aq. dulcis tepidæ prodeſt. Alterantia particularia foris pectori applicita ſimul illud dilatent, ut liberius moveri queat illiusque dolores, quos ex valida illa concuſſione ſentit, mulceant & materiæ in eo contentæ coctionem promoveant. In cauſa frigida conueniunt unguent. pector. Aug. empl. diaſulphuris *Rulandi* cum ol. amygd. dulc. malax. de meliloto, ex bulbis lilior & cœpar. ſub prunis coctis, contuſis butyroque mixtis. In calida thorax ol. viol. lilior. alb. unguento reſumptivo *Fernelii* vel roſato inungendus. Ad defluxiones divertendas pediluvia ex appropriatis commoda erunt. Allium ſeво urſino vel hircino permixtum, plantis pedum inunctum ad tuſſim ſiſtendam certum quorundam prædicatur remedium, medulla cervi, pinguedo lucii paria faciunt, ſub quorum remediorum debita adminiſtratione DEO ſoſpitan-

te indubie ſequetur ſanitas, optatus curationis.